

Datozen urteetan 34 karrera sortzea proposatu du EHUK

«Gizarte eztabaidarako» titulazioen mapa berria onetsi dute

Euskal Herriko Unibertsitateko Gobernu Batzarrak 34 karrera berri sortzea aurreikusten duen titulazioen mapa onartu zuen herenegun egindako bilkuran. Txostena Eusko Jaurlaritzarentzat loteslea ez den arren, titulazioei buruzko behin betiko erabakiak hartzen dituen aintzat hartzea espero du EHUKo organo gorenak.



EHUKo Errektoreordetza.

ARTXIBOKOA

Gorane Agirre / Bilbo

ERREKTORETZA taldeak landu eta Gobernu Batzarrak onetsi duen titulazioen mapak egun baimenduak dauden titulazio guztiak aztertu eta lehentasunaren arabera sailkatu edo baztertu egiten ditu. Horrela, proposatzen dituen 34 karrera berrietatik 21 «premiak» ezarri behar direla uste du; esaterako, Ingenieritzako hamar karrera eta Humanitateak, Zientzia Sozialak eta Juridikoak eta Osasun Zientzietako zenbait espezialitate.

«Premiazkoak» diren karrera horietatik sei Gipuzkoan izango lirateke, hamar Bizkaian eta bost Araban. Horrela, Fisioterapia, Materialen Ingeniaritza, Arkitektura Teknikoa, Kudeaketa eta Administrazio Publikoan Diplomaturak eta Filologia Alemana lirateke lehentasunezko ikasketa horietako batzuk.

EHUKo Gizarte Kontseiluak berretsi behar duen proposamen hori lantzeko, Errektoretza taldeak hainbat lan izan ditu kontuan: Peat Marwick kontsultorioak 1994. urtean Kontseiluaren

tzat egin zuen azterketa, Hezkuntza Sailak iaz aurkeztutako campusen garapenerako proiektua; 1996 eta 97an hedabideetan agertutako lan eskaintzak, eta campus, sail eta zentroek egindako eskariak.

Karrera berriei buruzko txostena «gizarte eztabaidarako» ekarpen legeaz aurkeztu du EHUK. Izan ere, proposamena Gasteizko Hezkuntza sailarentzat lotesle ez bada ere, titulazioei buruzko erabakiak hartzerakoan kontuan hartzea espero du.

Titulazioen mapa jorratzea, bakoitza zein campusetan eman eta martxan noiz jarri behar diren erabakitzea Eusko Jaurlaritzari dagokiola onartzen du Unibertsitateak. Hala ere, «prozesu horretan guztian EHUKo Gobernu Batzarra zein Gizarte Kontseiluak entzunak izan» behar direla uste du, eta hala jasotzen du txostenean.

Karrera teknikoan aldeko apustu finkoa • Txostenean karrera bakoitza lehentasunezko sailkatzeko arrazoiak zehazten dituzte

egileek. Esate baterako, ikasketa teknikoak bultzatu beharra dago Euskal Autonomia Erkidegoan (EAE) sortu berri diren enpresek exijitzen dituzten profesionalen ezaugarri berriak eta eskari gero eta handiagoak direla eta.

Aldi berean, testuaren zati handi batean proposatzen dituzten espezialitateak hautatzeko erabili dituzten irizpideak azaltzen ditu Errektoretza taldeak. Hari horretatik, EHUKen jarduerak «kanpoko mugak» egon badaudela jasotzen du, hain zuzen ere, «finantzaketa, presio ekonomiko eta politikoa, eta ikastetxeen historiaren ondorio direnak».

Horretaz gain, irakasle baliabideak «aurreko egoeraren fruitu dira, eta titulazioen ezarpena baldintzatuko dute», unibertsitateko agintariek diotenez. Ikasketa plan zahar eta berrien arteko harremanari eutsi beharra dagoela esan ostean, «unibertsitate moderno batek lehenengo zikloen orokortzea eta bigarren eta hirugarren zikloen espezializatzea» jo behar duela azaltzen dute txostenaren egileek.

Zentroak bikoiztearen auzia

EUSKAL HERRIKO UNIBERTSITATEAN (EHU) dauden campusetan karrerak bikoiztearen bideragarritasuna da Errektoretza taldeak egin duen txostenean aztertzen den beste gaietako bat. Ildo horretatik, garrantzitsua dela uste dute Euskal Herriko Unibertsitatean dau-

katen «tabu bat puskatzea».

«Sekula argitu gabeko arrazoiengatik, eta are gutxiago idatzitakoengatik, EHUn beti pentsatu izan da titulazioak bikoiztea zentzugabea dela», dio testuak. Bide horretatik, Bizkaian Zuzenbideko unitate bat eta Araban Enpresa

Zientzien beste bat martxan jartzeak sortu zuen gizarte oihartzuna gogorarazten du Unibertsitateko agintaritzak.

Errektoreordeen ustez, bikoizketen politika «ona zein txarra» izan daitekeela eta, «une bakoitzean era ezohikoan aztertu beharra» aldarrikatzen dute.

Dena dela, «titulazioak bikoiztearen jokabidea ez da berria» eta aspalditik egiten dela zehazten dute testuan. Horrenbestez, titulazio berrien mapa martxan jarri ahala bultzatu beharko diren ustezko bikoizketak justifikatzen dituzte Errektoretza taldekoek. X

laburrean

■ Euskararen Gizarte Erakundearen Kontseiluak maiatzaren 9an egingo du Batzar Nagusia

DATOZEN bi urteetan ardatz izango duen gestio plana onartzeko Batzar Nagusia egingo du Euskararen Gizarte Erakundearen Kontseiluak Donostian maiatzaren 9an. Gestio plan horren helburua euskararen normalizazio prozesuan jauzi kualitatiboa egitea da. Kontseilu honek euskararen egoera normalduz joateko dinamika berri bat sortzea du jomuga, eta bertara bildu nahi ditu gizarteko eragile sozial garrantzitsuenak. Modu horretan, etorkizunean dinamika hori bera eragile sozial eta politikoei zabaltzea da Kontseilu honen hurrengo helburua. Gestio plana onartzeaz gain, maiatzaren 9an Kontseiluko bazkide izateko nahia agertu duten erakunde berrien eskaria aztertuko dute. Antzerki Talde Amateurren Elkarteak, Argia, Mendebalde, Emun eta Tartalo taldeen eskariak ontzat emanaz gero 53 bazkide izango ditu Euskararen Gizarte Erakundearen Kontseiluak. X

■ UAren arabera, EAEko epaitegietan ez dago euskara erabiltzeko nahi handirik

ATZO Unidad Alavesa alderdiko idazkari nagusi Pablo Mosquerak gogor kritikatu zituen justizia administrazioa euskalduntzeko dauden eskariak. Izan ere, haren arabera, gizartean dagoen eskaria ez da oso handia. Hori baieztatzeko alderdian egin berri duten ikerketa batean plazaratu dituzten datuak izan zituen ahotan politikari erregionalistak. Datu horien arabera, 1996. urtean Araban eta Bizkaian soil-soilean prozedura judizialen %0,25ean eskatu zuten euskarazko itzulpena izatea. Gipuzkoan, berriz, %0,49an. Datu horietan oinarrituz, hitz latzak izan zituen ahotan Pablo Mosquera UAko idazkari nagusiak: «Hizkuntza normalizazioa behartzean datza». Horretatik, elkartasun eta zorion hitzak izan zituen Mosquerak hainbat elkarte judizialentzat: «Beraien eskubideen alde egin dutelako eta egin dizkieten mehatxuekin kikildu gabe kemen handia erakutsi dutelako». X

■ Astelehenean hasiko da Gasteizen III. Ostalaritza Saloia

EUSKAL HERRIKO zein gure mugetatik haratagoko ostalarien topalekua izango da Gasteiz astelehenean aurrera. Izan ere, asteazkena bitartean Arabako hiriburuko Europa Gizarte Etxean III. Ostalaritza Saloia egingo da. Arabako Ostalaritzako Enpresarien Elkarteak antolatutako bilkura honetan 58 enpresak hartuko dute parte. Guztiek ostalarientzat interesgarri gerta daitezkeen hainbat eskaintza eta ekoizpenen berri emango dute. Iaz saloi honek 4.000 bisitari inguru izan zituen, eta aurreko kopuru hori handitzea da saloi honen antolatzaileen helburu nagusietako bat. Astelehenean, saloiaren irekiera ekitaldian antolatzaileen alboan, besteak beste, Eusko Jaurlaritzako Turismo Saileko kontseilari orde Javier Blanco, Arabako Foru Aldundiko diputatu nagusi Felix Ormazabal eta Gasteizko alkate Jose Angel Cuerda izango dira. X

■ Altxaga ikastolako zortzi irakasleren alde egin du EAEko Justizia Auzitegi Nagusiak

EUSKO JAURLARITZAK hiru milioitik gora ordaindu beharko dizkie kalte-ordainetan Bizkaiko Altxaga Ikastolako zortzi irakasleri. Hori dio, bederen, atzo Vasco Press agentziak plazaratu zuenez, EAEko Justizia Auzitegi Nagusiak egin duen sententziak. Afera honek abiapuntua 1994. urtean izan zuen; izan ere, Altxaga Ikastolako zortzi irakasle Eusko Jaurlaritzak egindako dekretu batetik kanpo geratu ziren. Ondorioz, irakaskuntza publiko ez unibertsitarioan jarduteko aukeraketa probetan ezin izan zuten parte hartu. Vasco Press agentziaren arabera, ordea, Eusko Autonomia Erkidego Justizia Auzitegi Nagusiak ezeztatu egin du Jaurlaritzaren dekretu hori, eta zortzi irakasle horiek izan dituzten galerengatik kalte ordainak jasotzea behar dituztela erabaki du. X



Eskoriatzako Udala

IRAGARKIA

Osoko Udalak 1998ko apirilaren 29an egindako bileran, Eskoriatzako Planaemenduko Arau Subsidiarioen Berrikuspenaren aurrekontuaren iradokizunak edo planeamenduen beste aukera batzuk aurkezteko epea maiatzak 11 arte luzatzea onartu zuen.

Eskoriatzan, 1998ko irailaren 30ean. IDAZKARIAK.



Hondarribiko Udala

IRAGARKIA

1998ko udaldirako Udal-tzain Laguntzaileak kontratatutako behar dira.

Eskaeren aurkezpena: maiatzaren 12ko 13:00 orduak arte.

Oinarriak eta eskakera: Pertsonal Sailean (Kale Nagusia, 20-1.an)

Hondarribia, 1998ko apirilak 30. ALDIKO ALKATEA.